

Il strateg militar svizzer da grond renum

General Antoine Henri Jomini

DA JOHANN ULRICH SCHLEGEL

■ Igl è passads 140 onns ed il tema è actual pli che mai: La fundaziun da la strategia militar moderna. General Antoine Henri Jomini è mort cun 90 onns ils 22 da mars 1869 a Paris. Sco general en servetsch da l'imperatur Napoleun e pli tard sco general en servetsch da trais zars ha el fatg ina tala carriera che gnanc in scriptur avess pudì inventar ina pli magnifica. Jomini ha descrit l'istorgia mundiala – fin uss è cumparids passa 40 toms – ed influenzà quella decisivamain perquai ch'el aveva sco cumandant e strateg access als circuls auts e stretgs da las pussanzas mundialas.

Quai n'è dentant anc betg tut. Las ovras dal Svizzer – ch'è vegnì numnà da la Frantscha aristocrat e ch'è creschì si a Payerne, nua che sa chatta sia statua commemorativa – han fin oz ina gronda influenza sin la politica e sin la teoria militar, e quai en ils pajais ils pli impurtants dal mund, da l'America fin en la Russia. Jomini n'ha betg eliminà las guerras, el ha dentant contribuì a batter quell'idea – cura ch'el'las n'èn betg pli evitablas – cun dapli respect, a moda pli umanitaria e gist perquai era cun dapli success, ed el ha mussà co ch'ins po purtar pli svelto la pasch desiderada a las regiuns pertutgadas. La finala decida dentant anc adina il commando politic, schebain el vul suandar, impedir u promover las enconuschientschas da Jomini.

Onns da giuventetgna modests en il Vad

Auter che quai ch'ins spertgass forsà ha Jomini passentà sia giuventetgna lunsch davent da la politica mundiala. El è naschì ils 6 da mars 1779 sco figl dal scrivant da la citad da Payerne. Sia famiglia aveva planisà per el ina carriera professiunala sco commerciant. Suent l'emprendissadi a Basilea ed ad Aarau pratiggescha Jomini questa lavur dentant plitost mo sco occupaziun supplementara e provisorica. Dapli temp deditgescha el a l'istorgia. El acquista a moda autodidacta ina savida enorma. El studgia minuziusamain cunzunt la campagna militar da Napoleun en l'Italia ed el perscrutescha ils motivs ed ils effects da las activitads da Friedrich il Grond da la Prussia. Grazia a sia luciditad e ses grond dun linguistic obtegna el in post fitg lucrativ tar la banca Mosselmann a Paris. Ma en Svizra ed a l'exteriur èsi guerra da quel temp. La guerra al ha fascinà talmain ch'el ha investì durant tut sia vita tut la forza en quest fenomen. El returna en Svizra e daventa l'onni 1798 schefsecretari dal ministeri da guerra da la Republica helvetica ch'è sutmessa a la Frantscha. Senza scolaziun militar ordinaria daventa el l'emprim chapitani, lura cumandant dal battagliun e reorganisatur da l'armada Svizra che sa chatta va en in stadi fitg caotic.

Servetsch a la testa da la pussanza mundiala da lez temp

Danovamain carmala il vischin tutpussant il giuven um da la Svizra franzosa. El desdi sia piazza e returna a Paris. Sco billing discorra e scriva el bain tudestg e franzos. Ses emprim cudesch cun effect da signal cumpara en franzos: «Traité de grande tactique, Paris 1807». A Jomini reusseschi da persuader marschal Michel Ney. Quai al pussibilitescha da far l'enconuschientscha da l'um il pli pussant dal mund da lez temp, cun Napoleun Bonaparte. L'imperatur percorsa svelt che quest Svizzer posseda ina savida incredibla. Questa savida pudess dentant er esser in privel. El sa ch'er ils inimis legian ils cudeschs da Jomini davart l'art guerril. A tut pretsch vul Napoleun avair en sia vischinanza Jomini per betg ristgar da perder la controlla dad el. Il scumond da publicaziun per tscherts manuscrits che l'imperatur ha en mira augmentar dentant l'interess per Jomini.

Tuttina sche Jomini è en accompagna ment da l'imperatur u sin ils champs da battaglia, en privel da vita u sin puntg da



Antoine Henri Jomini – strateg militar da l'istorgia mundiala.

mort pervi da fom, stancladad e malsogna, el scriva in cudesch suenter l'auter. El daventa chavalier da la legiun d'onur e barun da l'imperi, ha dentant er inimis tranter las persunas pussantas. Ses superiur, il minister da guerra Louis Alexandre Berthier, odiescha l'arrivist da l'exteriur, quest sabiut, quest giuvenot tranter ils meritaivels da sia pasta, da la classe politique superieure da la Gronda Naziun.

Baruffa da las pussanzas mundialas pervi dal scheni militar

Las temas da Napoleun daventan realitad: L'inimi – l'imperatur russ, zar Alexander I – legia ils cudeschs da Jomini e trametta a Paris ses esploratur per incumbensas spezialas, colonel Tschernitschow, per spiunar Jomini. Tschernitschow ha l'incumbensa d'eruir la situaziun finanziala da Jomini. Ils Russ vulan carmalar il Svizzer cun immensas summas da daners. Reclama e spiunarscha s'uneschan. Jomini refusa. Il mess russ sa cumporta sin quai uschè dubius che la Frantscha al bandishescha.

Pauc pli tard fa la Russia danovamain in'offerta, questa giada è quella dentant uffiziala. La regenza russa conceda al Svizzer curt e bain, e senza che quel fissi stà preschent, il grad da servetsch da maior general cun il dretg d'avair da tut temp contact persunal cun il zar. Ma Jomini resta stativael.

Sulettamain l'ostilitad dal minister da guerra Berthier che sa chatta a Paris turmenta il scheni militar sco ina sumbriva infama. Jomini scriva mintga minuta libra. Berthier scriva dentant er e sa mussa sco grond concurrent publicistic.

Napoleun è infurmà tant davart ils Russ sco era davart l'animositad da Berthier. El promova Jomini sco general senza che

Berthier pudess cundecider e cumonda expressivamain a Jomini da cuntinuar a scriver.

Cunter il cussegl expressiv da Jomini ha lieu l'onni 1812 la campagna militar da la Frantscha cunter la Russia. Sco strateg militar prevesa Jomini la catastrofa. Napoleun resguarda la tenuta pessimistica da ses general sco era sia malaveglia chapavla areguard l'intenziun d'attagar ils Russ a moda directa e persunala. L'imperatur decida da laschar agir Jomini libramain davos las culissas. Uschia daventa el l'emprim guvernatur da Vilnius e da Smolensk e ses reschim dat en egl pervi da sia legalitad miaivla e rigurusa. Napoleun crititgescha dentant tuttina ses cumpogn fidaivel: El duaja durmir damain e smetter da bragir e da planscher.

Sco quai che Jomini aveva preditg ha la campagna militar da Napoleun fatg naufragi en Russia.

Mitschà per pauc da la mort

Jomini sondescha per l'imperatur franzos las pussaivladads da retratga al Dnjepr ed a la Beresina. Napoleun sez ha cumandà a ses general da brigada da construir la punt per la retratga generala sur la Beresina. Questa retratga na finescha betg mo per la truppa bunamain en ina catastrofa, mabain era per Jomini sez. El è malsau, cuntinuescha dentant a lavurar. El croda en il deliri. Curt avant che dar en svaniment vegn el purtà en ina chasa da purs. Ils Russ che s'avanzan dattan dentant fiu a quella. Mez mort sto el scappar en ina fradaglia da minus 30° celsius e croda en l'aua da la Beresina. Cun blera fortuna vegn el spendrà danovamain ed el surviva. Mais a la lunga sa mudregia el d'ina etappa a l'autra. Napoleun è fitg engraziavel ed exprima:

«Sche Jomini na fiss betg vegnì malsau il 1813, fiss el daventà marschal da la Frantscha.»

Lodi da Berthier envers Jomini persista. I n'è mai d'avantatg dad esser malsau e durant quest temp tenda Berthier ina trapa a ses adversari. El construescha ina renfatscha e reproscha a Jomini ch'el haja inoltrà cun retard in rapport da servetsch a l'imperatur. Uschia è stads dumbrads per il Svizzer ils dis da servetsch per la Frantscha.

Bunamain in mez tschientaner en il servetsch da l'imperi russ

Quai che n'è betg reussì a la Beresina, è reussì a Berthier. El maina Jomini en privel da vita cun pretender per el in arrest simpel e la paina da mort. Suent er esser vegnì umilià numerusas giadas e senza avair autras pussaivladads, sa decida Jomini da tuttina acceptar l'offerta dals Russ e d'entrar en lur servetsch. Jomini ed ils Russ sa cunvegnan ch'el na stoppia tradir ad els nagins secrets dals Franzos. Uschia è Jomini burgais Svizzer, in ester per la Frantscha e per la Russia, in spezialist per dumondas da militar ed ina persuna neutrala. Napoleun – sez bandischà sin l'insla Sontg'Elena – al declera explicitamain per liber da tut la culpa.

Dal 1813 fin il 1854 serva Jomini als zars russ Alexander I, Niklaus I ed Alexander II. El è iniziatur e confundatur da l'emprima academia militar da la Russia. Durant la guerra da Crimea cussegia el il zar per la davosa giada. Suent questa guerra returna el a Paris, la citad en il vest ch'è creschida a cor ad el.

Mai emblidà la patria

Era sche Jomini è mo stà darar en Svizra n'ha el mai emblidà sia patria. Per el era la Svizra in juvel entamez l'Europa, ina insla en las Alps. El chapiva quai sco avantatg per il pajais sez, dentant era sco avantatg per l'entira Europa. In di legia el en la gasetta che ses pajais d'origin vegnia – tenor il prinzi Metternich, in dals politichers ils pli impurtants da quel temp – sutmessa a l'Austria. Jomini sa drizza al zar e quel intervegn cun success en chausa. Ils dretgs acquistads durant la Revoluziun helvetica e l'indipendenza da la Svizra na dastgan betg vegnir violads. Jomini è in dals babs da la neutralitad svizra cuntanschida grazia al dretg internaziunal public.

La muntada da Jomini ozendi

Jomini ha contribuì d'ans deliberar da las grondas parolas politicas emozionalas. El sentenziescha expressiv sco «victoria a tut pretsch», «viver u murir» u «i dat mo ina via». Talas parolas politicas excessivas strasanan anc adina plain smanatscha or

da las buccas dals dictaturs da tenuta dretga e sanestra dal 20avel tschientaner. Dentant er il 21avel tschientaner n'è betg immun cunter talas parolas. Las guerras asimmetricas dal preschent sorprendan e sveglian regurdientschas als pli sgarschavels stadis da l'umanitad. Quai gist pervi da u forsà era malgrà las persunas che prendan la bucca plaina e proclameschan parolas saloppas, ch'affirmeschan la pasch e che mainan discurs davart ils dretgs umans. Quellas zuppentan dentant empè ch'ellas sclerissan. Cun ina vista turbada da las manzognas vegn lura fatg quai che contradi a la pasch ed al respect dal conuman.

Jomini è stà persvas che la proporzionalitad, la commensurabilitad e la neutralitad sajan la basa per ina buna convivenza. El ha pretendì da trair a niz las forzas existentas e da sa basar sin la valida da las interpresas militaras ed economicas e da ponderar bain tge consequenzas che las decisions han per quell'idea. Ch'igl è fitg impurtant da sa profundar en sias ideas demussa ozendi per exempel la guerra russa en la Tschetschenia. Er en il cas da l'America ston ins constatar che las consequenzas da la guerra en l'Afghanistan ed en l'Irac n'èn betg vegnidas ponderadas adequatamain. Gist ils dretgs umans vegnan violads e privads da lur cuntegn raschunavel, perquai che parolas memia abstractas mascreschan l'incapacitad da superar la guerra. Schebain che la publicitad è surfatga – era sch'ina sa tracta betg dal mender exempel – demussa quai il Guantanamo american ch'è daventà in simbol per questa problematica. La strategia militar influenzescha pia era fermamain la politica. Sche quella è memia empatica, sch'ella sa lascha influenzar memia fitg da la reclama, ristga ella da manchentar la finamira, da daventar demagogica e da perder la vista per l'essenzial. Igl è pli e pli grev da dir tgi che vegn manà e tgi che vegn surmanà. Interress da pussanza suppriman las propostas per objectivas. Aventuras remplazzan soluziuns stabilas. Sche la politica n'è betg abla da realisar ina strategia cun ina clera lingua, manca quella er en il sector militar.

En sias ovras ponderescha Jomini da reducir las contraversas militaras. El renviescha als avantatgs ch'ina reduziun da la brutalitad purtassan. Il strateg Jomini sa sviluppa a l'umanist.

I surprinda a moda positiva, sche las ovras da quest impurtant um Svizzer vegnan studegiadas ed approfondadas en las scolas militaras, da la Russia fin en l'America.

Plinavant vegn Jomini piazzà sin il medem stgalm sco in auter contemporan fitg impurtant, il general prussian Clausewitz. Jomini po era vegnir cumpareglià cun Sun Tse, il general e strateg chinai da renum mundial.



Louis-Alexandre Berthier – minister d'uiara franzosa che diffamava Jomini.



Michel Ney – marschal franzos che ha promovì Jomini.

FOTOS MAD